

Is Ikezuwa He Surat Ni Epustul Pablo Ziyà Te Menge TigTiselunika

Is Mehitenged te Ikezuwa he Surat he Para te TigTiselunika

Mibpekeventayan be te menge tumutuu ziyà te Tiselunika is menge lalag ni Pablo zuen te nehuna he surat din he mezawat dan? Su maan is midlavey pa is pira he vulan ne mid-umanan en maan sikandan pesurati ni Pablo ne in-uman din kandan ipenurù sikan is impenurù din en kandan duen te nehuna he surat din. Mepelevayen si Pablo kandan umbe impenurù din en maan kandan sikan is ingkepenurù din en he kinahanglan he metueni zan. Mibpehinumduman din sikandan su wey mebmelig-en is kedtuu zan minsan pa te ebpesipelahan sikandan. Nekagi zin kandan he zuen tuyù dutun te kemeresayan dan su emun egkaahà te zuma he edsunud gihapun sikandan te Megbevayà minsan ke edlised dan ne egkehimu he iyan haazà ebpekehinggat te zuma wey zan iyan meserigi is Megbevayà ne wey zan meزالig sikandin. Ne egkeuma is timpu he edsilutan sikan is menge etew he ebpesipala kandan. Impetentenuzan daan ni Pablo te menge tigTiselunika he kenè dan engkezi te ebperateng si Jesus. Egketuenan dan he wazè pa sikandin medlikù su emun edlikù sikandin egkehuna egkehita vù is kedsukul te utew mahabet he menge etew ziyà te Megbevayà wey is kebpegawagawa zuen te etew he utew lavew he mekesesalà. Kayi he surat ni Pablo impesavut din en maan he ke zuen menge pegulen su edtagad dà te kedlikù ni Jesus, kinahanglan he iringi zan sikandin wey is menge zuma zin he nenigudu wey zan mekuwa is menge kinahanglan dan su wey zan kenà mekesamuk te zuma.

1 ¹Sikami, si Pablo, si Silas, wey si Timoteo, ebpesuratan dey sikiyu is menge tigTiselunika he gaked te Amey tew he Megbevayà wey gaked te Nengazen tew he si Jesu Kristu. ²Berakat he ikegagew kew te Amey tew he Megbevayà wey te Nengazen tew he si Jesu Kristu, ne vegayi kew zan te melinawen he kebpekesavuk.

Is Metazeng he Kedhukum

³Menge suled, kinahanglan he layun dekelà is kebpelelemati zey te Megbevayà tenged keniyu. Ne hustu heini su layun dekelà is keduswag te kedtuu niw wey layun daan ed-iseg is kebmahala niw te uman sevaha he menge zuma niw ziyà te gehinawa niw. ⁴Ne tenged kayi emun ebpenumbelayan dey is menge tumutuu te Megbevayà diyà te minsan hendei he inged, ebentugen dey sikiyu tenged te kedsarig niw te Megbevayà wey tenged te kebmeinentusen niw te menge kemeresayan wey kemeregenan he egkesegazan niw.

⁵Heini is kedsarig niw wey ked-antus niw, ne iyan tuus he metazeng is kukuman te Megbevayà su pinaagi te memerasey he egkeantus niw, ibpeehè din he zait kew he idragkes dutun te menge etew he edhedian din. ⁶Metazeng is menge ulaula te Megbevayà ne edresayan din keuzemà is menge etew he midrasey keniyu guntaan. ⁷Ke ibpegawagawa keuzemà is Nengazen tew he si Jesu Kristu he ebpuun te langit, id-awè din diyan te keniyu wey zini zaan te kenami is kemeresayan he egkeantus tew guntaan.

Egkukumbalà sikandin te iring te regreg wey edumahan te menge mekegegehem he menge velinsuguen din. ⁸Dutun, edsilutan din sikandan is wazà medtetenged te Megbevayà wey wazà mebpemineg te Meupiya he Tudtulanen te keagi te Nengazen tew he si Jesus. ⁹Iyan silut din kandan is kemetayen he wazà pidteman. Egkesuwey zan is Nengazen wey is mekegegehem he anlag din. ¹⁰Egkehitavù heini keuzemà dutun te andew te kedlikù din. Iyan idlikù din dini te kelibutan su wey mezalig sikandin te menge etew he mibpesakup kandin. Dutun, ne ebentugen sikandin te langun he menge tumutuu kandin wey sikiyu zaan su neketuu kew te impesavut dey keniyu.

¹¹Tenged kayi layun dey sikiyu id-ampù. Ed-ampù key he himuwa te Megbevayà is menge ulaula niw he zait te kedtuu niw kandin. Ed-ampù key he pinaagi te gehem din himuwa zin he tumana niw is minsan hengkey he meupiya he ulaula he iyan en tuyù niw tenged te midtuu kew kandin. ¹²Ne pinaagi kayi egkezalig niw is Nengazen tew he si Jesus, ne edeligen kew zin daan. Egkehimu heini pinaagi zà te gagew te Megbevayè tew wey te Nengazen tew he si Jesu Kristu.

Sikan is Eteu he Uteu Lavew he Mesinupaken

2 ¹Ne guntaan, menge suled, ibpesavut dey keniyu is kedlikù keuzemà te Nengazen tew he si Jesu Kristu wey is kedtulusa zin kenitew. ²Edhengyuan dey sikiyu he kenè kew petuluy meliveg wey mahandek emun egkezineg niw is tudtul he neuma en is andew te kedlimasa te Megbevayà te menusiya. Kenè kew meliveg kayi minsan ke lalag he

ibpinted kun, wey ke tudtul zey kun be, wey minsan surat he zini kun ebpuun te kenami. ³Kinahanglan he kenè niw tuuwi is minsan hengkey he lalag te minsan hentei he teruen he etew. Su haazà is andew, ne kenè pa egketuman emun wazè pa mehitavù is kedsukul te menge etew ziyà te Megbevayà. Ne zutun ibpegawagawa sikan is etew he lavew he mesinupaken. Iyan imbanglis kandin is kegkeimpirnu. ⁴Edsukulan din wey edlevawan din pezem is minsan hengkey he mid-isip te menge etew he megbevayà wey is minsan hengkey he ed-ezapen dan. Ne ebpinuu sikandin minsan diyà te simbahan he Valey te Megbevayà su egkegiyen din he iyan sikandin Megbevayà.

⁵Wazè niw pa vuwa melipati he migkagi ku en heini is langun hein diyan e pa te keniyu. ⁶Netuenan niw ke hengkey is ed-egen dutun te utew mesinupaken he etew su wey kenè pa sikandin mekepegawagawa te kenè pa hustu he timpu. ⁷Su is gehem dutun te utew mesinupaken, egemiten din en guntaan he meeles. Ne ebpekeeles-eles pa sikandin taman te kenè pa id-awà sikan is ed-egen kandin. ⁸Ne zutun, human ebpegawagawa sikan is utew mesinupaken he etew. Iyan, dutun te kebpekeuma ni Jesus edhimetayan sikandin ni Jesus pinaagi te mekegegehem he anlag din; edhiyupen din dà ne segugunà ebpatay, ne egkeawà is gehem din. ⁹Emun ebpegawagawa keuzemà sikan is mesinupaken he etew egemiten din is gehem ni Setanas ne ibpeehè din is gehem din pinaagi te minsan hengkey he tarù he menge singyal wey egkein-inuwan. ¹⁰Edterteruan din te minsan hengkey he kelelalung he paagi sikan is menge etew he kenà ebpekelikey te silut. Umba kenè dan ebpekelikey te silut su wazè dan medawat te tutuu he tuluuwen he iyan ebpekevegey kandan te untung he wazà pidteman. ¹¹Ne tenged dutun idtugut te Megbevayà he meekali sikandan pinaagi te ketetarù he ebpekeakal su wey zan metuuwi is kenà tutuu. ¹²Ne tenged dutun, edsilutan te Megbevayà is langun he kenà edtuu te tutuu he tuluuwen, su iyan igkesuat dan is mezaat he ulaula.

Is Kebpili te Nengazen

¹³Menge suled he minahal te Nengazen, kenà egkehimu he kenà dekelà layun is kebpeselemati zey te Megbevayà tenged keniyu. Su zangan hein midlimbag din is langun, mibpili kew zin wey kew zin melibri te silut pinaagi te gehem te Wagas he Mulin-ulin he iyan ingkehimu niw he menge gaked din, wey pinaagi te kedtuu niw te tutuu he tuluuwen. ¹⁴Midhimu kew zin he menge tumutuu kandin pinaagi te kebpesevuta zey keniyu te Meupiya he Tudtulanen su wey kew mekeambit te utew kegkelavew te Nengazen tew he si Jesu Kristu. ¹⁵Ne tenged kayi, menge suled, pekezesen kew te kedtuu niw, ne hemeni niw is langun he impenurù dey keniyu pinaagi te kedwali zey hein diyan key wey pinaagi zaan te kebpesurati zey keniyu.

16,17 Berakat he lipaya kew wey lig-eni kew te Nengazen tew he si Jesu Kristu wey te Amey tew he Megbevayà su wey meupiya is langun he menge vaal niw wey is langun he menge lalag niw. Mahal kiw layun diyà te gehinawa zin ne pinaagi te gagew zin kenitew zuen tew igkelipey he wazè din pidtemanayan wey zuen tew zaan utew meupiya he ebperetengen.

Is Ked-inempuey

3 ¹Ne guntaan, menge suled, iampù key keniyu wey megaan mekeeneb ne mezawat diyà te minsan hendei is kebpesevuta zey te Lalag te Nengazen iring te kegezewata niw kayi ziyàn te keniyu. ²Iampù key zaan wey key mekeliyu te pesipala te menge kenà metazeng wey lalung he menge etew su mezakel is kenà edtuman te lalag din. ³Iyan, metinumanen mulà is Nengazen te lalag din, ne iyan sikandin ebantey wey edlig-en keniyu wey kew kenà mekeizi ni Setanas. ⁴Tenged te kedsarig dey te Nengazen, netuenan dey he ebpenigudu kew pa edtuman te menge sugù dey keniyu. ⁵Berakat he ipesavut keniyu te Nengazen ke sengemenu kew zin kemahal ziyà te gehinawa te Megbevayà wey himuwa zin he vegayi kew ni Kristu te kelig-en wey niw maantus is kemeregenan.

Is Menge Pegulen

⁶Menge suled, tenged te kegehem te ngazan te Nengazen tew he si Jesu Kristu he imbegey kenami, duen menge idsugù dey keniyu. Iyan is: kenè kew mebpekiduma te tumutuu he tepulen he kenà edsunud te impenurù dey keniyu. ⁷Netuenan niw en is egkeveelan niw wey kew mekeiring te ebeelan dey. Su hein diyan key te keniyu kenè key tepulen. ⁸Wazè key mekevuyù te egkeenen dey ziyà te minsan hentei, kekenà, mibeyazan dey. Maandew wey mezukilem midhagù key mebaal su wey kew kenà medlised tenged kenami. ⁹Duen dey ketenged te kebpesuhul keniyu, iyan, wazè key mebpsuhul, kekenà, midterebahu key su wey zuen ulaula zey he egkeiringan niw. ¹⁰Hein diyan key pa iyan penurù dey keniyu is: sikan is kenà edterebahu, kenà ipekaan.

¹¹Impenudtul kenami he zuen diyan menge zuma niw he menge tepulen. Kenè dan kun edterebahu, kekenà, edsemuken dan is terebahu te menge zuma zan. ¹²Tenged te kegehem te Nengazen tew he si Jesu Kristu, idsugù dey wey idhangyù dey kandan he kinahanglan he medterebahu zan ne kenè dan medsamuk su wey zan meketigayun te igkeuyag dan.

¹³Ne sikiyu zaan, menge suled, kenè kew meevek te ked-ulaula te meupiya. ¹⁴Ke zuen minsan hentei he tumutuu he kenà ebpeming te menge sugù he insurat dey kayi te surat, kilelala niw ne kenè kew mebpekiduma kandin su wey meeled sikandin, ¹⁵ iyan, kenè niw isipa he kuntada niw, kekenà, penurua niw he iring te suled niw.

¹⁶Berakat he ivegey keniyu te Nengazen is melinawen he gehinawa te minsan keenu he timpu wey te minsan hengkey is kebpekesavuk niw. Iyan sikandin ebegey te kelinew. Dumahi kew is langun te Nengazen.

¹⁷Iyan a si Pablo; impirma ku kayi is ngazan ku. Iyan heini tuus he idsavuk ku te langun he menge surat ku, wey iyan heini paagi te kedsurat ku.

¹⁸Sikiyu is langun, ikegagew kew te Nengazen tew he si Jesu Kristu.